

Inatsisartut peqqussutissaattut siunnersuummut oqaaseqaatit

Nalinginnaasumik oqaaseqaatit

1. Aallaqqaasiut

Pujortaqqusinnginneq pillugu Inatsisartut inatsisissaattut siunnersuummik Peqqussutsimut Naalakkersuisoq UPA2010-mut saqqummiussivoq.

Illup iluani nalinginnaasumik pujortaqqusinnginneq illullu iluani pujortartarfimmik pilersitsisinnaanerup kiisalu illup iluani pujortarsinnaanermut ilaannikkuinnaq akuersissuteqartarnerup atorunnaarsinneqarneri siunnersuutikkut piviusunngortinneqassapput.

Tupa avatangiisinillu tupatorfiunngitsunik isumannaarineq kiisalu tupanik nioqqutissat nalunaaqutserneqartarneri pillugit maannakkut inatsisartut peqqussutaanni avatangiisit tupatorfiunngitsut pillugit aalajangersakkat taamaalilluni illup iluani pujortaqqusinnginerup taarsissavai.

2. Siunnersuummi immikkoortut pingaarnerit

Tupa avatangiisinillu tupatorfiunngitsunik isumannaarineq kiisalu tupanik nioqqutissat nalunaaqutserneqartarneri pillugit inatsisartut peqqussutaannut allannguutissatut siunnersuutip peqqussutip taaguutaa allanngortissavaa avatangiisinilu tupatorfiunngitsut pillugit aalajangersakkat atorunnaarsissallugit.

Pujortaqqusinnginneq pillugu inatsisissatut siunnersuutip saqqummiunneqartup taamaalilluni siunnersuut kinguneraa.

Peqqussummi tupa pillugu aalajangersakkat allat, tupanik nioqqutissanik nioqquteqarneq, tupanik nioqqutissanik nalunaaqutsersuineq, tupanik nioqqutissat pilersaarutigineqarneri aamma aalajangersakkanik unioqqutitsinernut pineqaatissiisarnerit allannguuteqaratik ingerlaqqipput.

3. Inatsiseqarnikkut atuuttut

Tupa avatangiisinillu tupatorfiunngitsunik isumannaarineq kiisalu tupanik nioqqutissat nalunaaqutserneqartarneri pillugit Inatsisartut peqqussutaanni nr. 5-imi, 3. november 1994-imeersumi pineqartut siullermeersumik aaqqinneqarput. Pujortaqqusinnginneq pillugu malittarisassat 1998-imi, 2000-mi 2004-milu sukaterneqarput. Pineqartoq ullumikkut tupa avatangiisinillu tupatorfiunngitsunik isumannaarineq kiisalu tupanik nioqqutissat nalunaaqutserneqartarneri pillugit

Inatsisartut peqqussutaatigut nr. 10-ikkut, 14. november 2004-meersukkut malittarisassaqaartinneqarpoq.

4. Pisortanut aningaasaqarnikkut aqutsinikkullu kingunerisassai

Siunnersuut pisortanut aningaasaqarnikkut aqutsinikkullu kinguneqassanngilaq.

5. Inuussutissarsiornermut allanullu aningaasaqarnikkut aqutsinikkullu kingunerisassai

Siunnersuut inuussutissarsiornermut allanullu aningaasaqarnikkut aqutsinikkullu kinguneqassanngilaq.

6. Innuttaasunut aningaasaqarnikkut aqutsinikkullu kingunerisassai

Siunnersuut innuttaasunut aningaasaqarnikkut aqutsinikkullu kinguneqassanngilaq.

7. Avatangiisinut pinngortitamullu kingunerisassai

Siunnersuut avatangiisinut pinngortitamullu kinguneqassanngitsoq naliliisoqarpoq.

8. Naalagaaffeqatigiinnermut namminersornermullu tunngasut

Siunnersuut Naalagaaffeqatigiinnermut tunngasunut sunniuteqassanngilaq imaluunniit namminersorerup annertunerulerneranik kinguneqassanani.

9. Oqartussaasunut, kattuffinnut allanullu tusarniaaneq

Pujortaqqusinnginneq pillugu Inatsisartut inatsisissaattut siunnersuutip saqqummiunneqartup siunnersuut kinguneraa. Avatangiisit tupatorfiunngitsut pillugit maannakkut aalajangersakkat taamaallaat siunnersuutikkut atorunnaarsinneqarput kiisalu inatsisartut peqqussutaata taaguutaa allanngortinneqarluni.

Tassalu inatsisartut peqqussutaata imarisaasa allanngortinneqarnissaat uani pineqanngilaq, taamaattumik siunnersuut oqartussaasunut kattuffinnullu tusarniaassutigineqarsimanngilaq.

Siunnersuummi aalajangersakkat ataasiakkaat pillugit oqaaseqaatit

§ 1-imut

Nr. 1-imut Taaguutaani oqaatsit ”tupa avatangiisinillu tupatorfiunngitsunik isumannaarineq kiisalu” peerneqarput. Peqqussutip taaguutaa tamatuma kingorna imaalerpoq: ”Tupanik nioqqutissat nalunaaqutserneqartarneri nioqqutigineqarnerilu pillugit Inatsisartut peqqussutaat”.

Nr. 2-mut §§ 2 – 7 avatangiisinut tupatorfiunngitsunut tunngasut atorunnaarsinneqarput.

§ 2-mut

Pujortaqqusinnginneq pillugu Inatsisartut inatsisissaatut siunnersuutip ulloq atortuulerfia malissavaa, taassuma atortuulerfiatut ulloqarluni.